

Cand Zandrine Blossy è vnu à monde.

Gaston LUCY.

Lu pére Blossy avot ène coumére, la grande Zandrine, k'on la loumot. Ile avot chapé toute seule du trwâs afants jumôs. Ça avot sté drole, alèz, çt' acoûtmint là. Çu djoû-là, lu pére Blossy astot vôi râyî às cartouches às Monts-Thy avu s'bê-pére, lu pére Bansly.

On l'loumot insi pask'i fjot des panîs, des banses, des tchètoûres, des curtains etc. I travayot l'chinon, kwè !

Il avint aturpri des cartouches (*pommes de terre*) al mitan pou l'vî Nârcisse, in vî malin ki vicot câzumint à rantier avu tous parèys ou pére Blossy.

Il astint don an trin d'râyî dpwis à matin et i gn'avot wêre du cartouches cut' anéye-la. Iles avint stî adjaléyes trwâs côps tins dul campagne et les singlés î avint co vnu.

A in moumint, lu pére Bansly dit insi :

— Eh bin, ké nouvèle ? Et la Tazie, i gn è co rin ?

— Ma fwè non, i gn avot co rin à matin et dju n' ans co rin vu jusk' asteure. Ça m' catibule cand min.me du n' rin sawè ; al mâjon, i duvrin bin vnu dîre kwé .

— S'i n' vunat nin, c'est k'ça n'va nin pu mâ, alèz .

— Alans-rza, dit-i ou dbout d'in moumint l' pére Bansly, dju wès bin k' vous transichèz avu ça.

Rintrés al mâjon, i gn avot co rin d'tchandjî ; mès l' pus mâ dul bande, c'ère co l' pére Blossy ; i troupinot sins arèt, i n' astot bin nène pârt et voulla ki rèche (*le voilà qui sort*).

—Èyusse ku-z alèz, dit-ile la vîe Bibine, sa bèle-mére coume ça, dumèrèz la, si onz è dandjî d'vous, tt'aleure.

— Dju n' m' ava nin ôh !, dju m' va djusse ou pachî.(*verger près de la maison*)

Mès, arivé ou pachi, il è vitmint continuwé jusk' amon la Marie Grawîye, ki tnot cabaret in pô pus lon.

— Eh bin kwè ! Zande. Et la Tazie , ké nouvèles ? I gn è co rin ?

— Bin non, alèz, Marie, i gn è co rin.

Et à buvant sa goute, is câzint d'ène afwêre et l'ôte.

— Dju vôros cand minme bin k' ça srot fwêt, da, Marie. On n' èst jamwès trankile ku cand ça est fini, don, ces cayèts-là.

— Z'ôz bin rêzon, Zande.

— Voûdèz m'a co yène, alèz, Marie !

I nn'avot dja chouflé kékènes cand la pu vîe des gamines è vnu lî dire :

— Ruv'nèz in pô, ôh, Ppa, dju vnans d'awè in ptit valet, in bê, da !

— Ké chance ku dj' n' ére nin la, mi k' ès sansibe coume tout. Rindèz m' ène goute, alèz Marie.

Ène dumyi-eûre èt kékes goutes après, la bwêchèle raplike :

— Vous n'vunèz nin mu r'kê, don chûrmint, dj'âros bin ralé tout seû .

— C'èst nin ça, oh, Ppa, mê ruvnèz cand minme la, dj'ans co royu in ptit valet.

— Co in ptit valèt ? Ça fwêt deus insi ?

— Plindèz-v' co, Zande, z'astèz comblé.

— Ké chance du n' nin awè sté la, avu m' keur sansibe. Rindèz m'a yène, alèz Marie.

In kârt d'eûre après, on dovure l'uch du cafè. C'ère co la bwêchèle ki rvunot.

— Dju m'arva, da, Hortense, mès deus ptits valèts d'in côp, i fât l'timps d' s' î fwêre, don !

— Ruvnèz, da, c'côp ci, dj'ans co royu ène putite bwêchèle.

— Co ène putite bwêchèle ! Dju n'à rvins nin. Ah bin ! par exampe.

— Ahy, ça fwêt trwâs, là, Ppa !

— Mu keur n' ârot jamwès supwârté ça. Rindèz m' ène goute, Marie ! Et pî, dj' arirê, la Tazie est capabe du m' à fwêre jusk'al nute ! Coubin k'dju v' dèz ? (*Combien vous dois-je ?*)

— Cate francs, dit-ile la Marie, k'avot compté lâdje.

Lu Zande è rmonté coume il è polu ; èt d'sa rintrée al mâjon avu la fame et la bèle-mére, vât mî n' nin-z à câzer !

Gaston LUCY.

